



Hadž mebrur – iskrenost i slijeđenje Objave (Meka)

Hatib: dr. Abdullah ibn Avad el-Džuheni

21. zulkade 1447. po Hidžri / 8. maj 2026.

Hvala Allahu Koji je ovom ummetu upotpunio propise islama i hodočašćenje Svoje Časne kuće učinio obaveznim onome ko je u mogućnosti da ga obavi, i za to pripremio veliku nagradu i obilje dobrote, i obećao onome ko obavi hadž, a pri tome se kloni bestidnog govora i grijeha, da će se vratiti čist od grijeha kao na dan kada ga je majka rodila. To je "hadž mebrur" za koji Allah nije odredio drugu nagradu osim Dženneta, Kuće mira.

Njega hvalim i zahvaljujem Mu, i svjedočim da nema boga osim Njega, Vladara, Svetog i Onoga Koji je bez nedostataka, i svjedočim da je Muhammed, sallallahu alejhi ve sellem, Njegov rob i poslanik; najbolji među onima koji su klanjali, hadž obavljali, zekat davali i postili. Neka su Allahova milost, blagoslov i spas na njega, njegovu porodicu, njegove plemenite i čestite ashabe, i sve one koji ih slijede u dobročinstvu sve dok se smjenjuju noći i dani.

Preporučujem vama, o muslimani, hodočasnici Allahove Časne kuće, bogobojaznost, i stalnu svijest o Allahovom nadzoru, javno i tajno. Vi ste pod Njegovom vlašću, potčinjeni Njegovoj moći i Njegovoj volji; nema utočišta niti spasa od Njega osim kod Njega.

Budite iskreni prema Allahu u riječima i djelima, čvrsto se držite Allahove Knjige i sunneta Njegovog Poslanika, sallallahu alejhi ve sellem, jer su u njima sreća, ponos i spas. Znaite da Allah poznaje vaše nutrine kao što poznaje i vašu vanjštinu, i ništa Mu od onoga što radite nije skriveno.

O vjernici, Allah je ukazao posebnu milost ummetu Muhammeda, sallallahu alejhi ve sellem, pa ga je uputio ka znakovima istine, osvijetlio mu put razboritosti, olakšao mu puteve dobra i uzroke sreće, te mu otvorio vrata nade i optimizma. Samo što





prođe jedno odabrano vrijeme, a već dođe drugo. U ovim danima osjećaji muslimana pokreću se čežnjom i žudnjom prema Allahovoj Časnoj kući, radi obavljanja umre i hadža, kao i posjete džamiji Allahovog Poslanika, sallallahu alejhi ve sellem.

Molim Allaha da im olakša putovanje, podari ugodan boravak, i molim Ga da nama i njima podari hadž mebrur, dobro djelo koje će biti kabul i trud koji će biti hvale vrijedan.

Ummete islama, od Allahove milosti prema ummetu našeg vjerovjesnika Muhammeda, sallallahu alejhi ve sellem, jeste i to da je hadž učinio obaveznim samo jednom u životu svakom punoljetnom i umno sposobnom muslimanu, ukoliko je u mogućnosti.

Onaj ko želi obaviti hadž treba da očisti svoj nijet i posveti ga isključivo Allahu, da svoja djela uskladi sa sunnetom Allahovog Poslanika, sallallahu alejhi ve sellem, da hadž obavi od halal zarade i da bude darežljiv u trošenju, jer Allah je lijep i prima samo ono što je lijepo. To je veći razlog za povećanje njegove nagrade.

Hakim bilježi od majke vjernika Aiše, radijallahu anha, da joj je Allahov Poslanik, sallallahu alejhi ve sellem, rekao dok je obavljala umru: "Tvoja nagrada bit će srazmjerna tvom trudu i utrošenom imetku." (Hakim i Darekutni)

Posebno tebi, hadžijo, savjetujem da svoje djelo iskreno posvetiš Allahu i da svoje srce ne vezuješ ni za koga osim za Njega, slavljen neka je. Ne traži ispunjenje svojih potreba osim od Allaha, Uzvišenog, jer On ispunjava potrebe, odaziva se dovama i sve može. Sve mimo Njega ovisi o Njemu i potrebno je Njegove pomoći. Uzvišeni kaže: "Onaj Koji se nevoljniku, kad Mu se obrati, odaziva, i Koji zlo otklanja i Koji vas na Zemlji namjesnicima postavlja. – Zar pored Allaha postoji drugi bog? Kako nikako pouku vi da primite!" (En-Neml, 62)

"Ako ti Allah dade kakvu nevolju, niko je osim Njega ne može otkloniti, a ako ti zaželi dobro – pa, niko ne može blagodat Njegovu spriječiti; On njome nagrađuje onoga koga hoće od robova Svojih; On prašta i milostiv je." (Junus, 107)





Zato se bojte Allaha, poštujujte Allahove svetinje, pridržavajte se normi lijepog ponašanja kod Njegove Kuće, u Njegovom sigurnom gradu i u gradu Njegovog plemenitog Poslanika, sallallahu alejhi ve sellem, i nastojte da vaš hadž bude čist i iskren radi Allaha, da vam ponašanje bude lijepo, govor prijatan i postupci u skladu sa sunnetom, kako biste zaslužili nagradu i sevap.

Allahu naš, podari nam iskreno vjerovanje, dobra djela koja će biti kabul kod Tebe, iskreno pokajanje, hadž mebrur, oprost naših grijeha, pokrivanje naših mahana, uputu našim srcima, svjetlo našim pogledima i Svoju milost i zadovoljstvo. Allahu, oprosti nama, našim roditeljima i svim muslimanima. Ti si, doista, Onaj Koji mnogo prašta i Milostivi.

Hodočasnici Allahove Časne kuće, bojte se Allaha, i znajte da hadž i umra imaju svoje ruknove (sastavne dijelove), vadžibe (obavezne radnje), sunnete i adabe (preporučenje radnje). Kada musliman stupi u obrede, odnosno obuče ihrame i donese nijet, obavezuje se na određene obrede koje mora upotpuniti, kao što se obavezuje i na ostavljanje ihramskih zabrana/prijestupa. Allahov Poslanik, sallallahu alejhi ve sellem, rekao je: "Naučite od mene svoje obrede hadža." (Ebu Davud)

Uzvišeni Allah dao je da u ovim čistim i svetim mjestima budu oni koji imaju sposobnost i mogućnost da služe zemlji Dva hrama, čuvaju svetinje i brinu se o onima koji ih hodočaste. Vlast Kraljevine Saudijske Arabije, Allah je pomogao i učvrstio, postavila je u Dva hrama i na svim mikatima učenjake koji upućuju ljude, podučavaju ih obredima hadža i usmjeravaju ih na ispravan put. Uzvišeni kaže: "Pitajte učene ako ne znate." (En-Nahl, 43)

Uz to, stavljene su u službu i savremene digitalne tehnologije radi olakšavanja boravka Allahovim gostima.

Zato nastoj, brate hadžijo i sestro hadžinice, da vaša umra i hadž budu mebrur (ispravan i iskren u ime Allaha), a vaš trud nagrađen. Allahov Poslanik, sallallahu alejhi ve sellem, rekao je: "Za hadž mebrur nema druge nagrade osim Dženneta." (Taberani) Također je rekao: "Ko obavi hadž radi Allaha, pa ne bude govorio ružne





rijeći niti griješio, vratit će se čist od grijeha kao na dan kada ga je majka rodila.”
(Buhari)

Ovo je vaša prilika, hodočasnici Allahove Časne kuće, u ovim svetim mjestima, mjestima spuštanja Objave, da prolijete suze kajanja koje će oprati tragove grijeha, da tražite oprost od svoga Gospodara pa da vam oprost, i da Mu se iskreno pokajete pa da primi vaše pokajanje.

O vjernici, često donosite salavat i selam na najbolje Allahovo stvorenje, Muhammeda b. Abdullaha, sallallahu alejhi ve sellem, i njegovu časnu porodicu.

Allahu, budi zadovoljan pravednim halifama, svim ashabima, kao i onima koji ih slijede u dobročinstvu do Sudnjega dana.

